

CONVENIO DE COLABORACIÓN ENTRE O CONCELLO DE SANTIAGO DE COMPOSTELA E CÁRITAS INTERPARROQUIAL

En Santiago de Compostela, 11 de novembro de dous mil oito

REUNIDOS:

Dunha parte:

O Ilmo.Sr.D.Xosé Antonio Sánchez Bugallo, Alcalde do Concello de Santiago de Compostela, que actúa en nome e representación desta Corporación, en virtude das competencias que lle son recoñecidas polos artigos 124 da Lei 7/85, do 2 de abril, reguladora das bases do réxime local, e 61 da Lei 5/97, do 22 de xullo, de Administración local de Galicia.

E doutra:

Dona Amelia Pereira Menaut, con DNI 33.216.346-E, que intervén neste acto en calidade de representante legal da Institución Cáritas Interparroquial de Santiago de Compostela, con número de identificación social Q-1500053-B e domicilio social na rúa Hospitaliño nº 2.-bis, código postal 15704, en Santiago de Compostela, como entidade constituída no ano 1.965 ao abeiro da lexislación, actuando como presidenta e conforme as competencias que ten atribuídas de acordo co artigo 51 dos estatutos da Institución.

Ambas as dúas partes no nome e representación que ostentan e coa capacidade legal para este acto

EXPOÑEN

Primeiro.

O Concello de Santiago de Compostela vén desenvolvendo, consonte a Lei 7/85, do 2 de abril, reguladora das bases do réxime local, a súa competencia de obrigado exercicio respecto á prestación de servizos sociais de promoción e reinserción social.

É prestación básica dos servizos sociais, entre outras, a animación, prevención e cooperación social, que teñen por obxecto potenciar a participación de persoas e grupos na vida comunitaria, fomentando a iniciativa social, a solidariedade, o asociacionismo e o voluntariado, así como favorecer a toma de conciencia da cidadanía sobre os seus problemas e poñer en marcha mecanismos que fagan posíbel a participación destes na busca de solucións e na xestión dos servizos e actividades que se demanden.

Segundo.

En resposta ao artigo 9.2 da Constitución, en defensa dos dereitos e promoción dos intereses sociais, o Concello de Santiago de Compostela vén promovendo as condicións para que a liberdade e a igualdade dos individuos sexan reais e efectivas, así como a remoción dos obstáculos que impiden ou dificulten a súa plenitude, facilitando a participación de toda a cidadanía na vida política, económica, cultural e social.

Con este referente, que é coincidente coa propia filosofía dos Servizos Sociais, entendidos estes como instrumento da política social, no ánimo de acadar a xustiza e a calidade de vida dos individuos e grupos, pola vía da promoción da participación, nun trato de igualdade e non exento de consideración ás peculiaridades dos diferentes colectivos e grupos, o Concello de Santiago de Compostela desenvolve, no ámbito das súas competencias, programas e actuacións co fin de garantir a calidade de vida e unha orde social máis xusta e solidaria

Terceiro.

A Entidade “Cáritas Interparroquial”, configúrase como unha organización non Gubernamental (ONG), con capacidade xurídica e plena capacidade de obrar, carecendo de ánimo de lucro.

Cuarto.

A Entidade, ten como fin xeral, segundo os seus estatutos, a detección e a avaliación das problemáticas (tanto individuais coma colectivas) e o establecemento das solucións de acordo cos recursos sociais deste nivel de atención, ou se é o caso, a súa derivación ós servizos especializados, así como o seu seguimento, establecendo para isto, vías de coordinación e colaboración cos organismos públicos e as organizacións privadas, que presten servizos que afecten ao benestar social, procurando a maior rendabilidade e racionalidade deles.

Para a consecución deste fin, a Entidade “Cáritas Interparroquial”, está a desenvolver actividades de promoción social e desenvolvemento comunitario, encamiñadas basicamente á acción social, abrindo novos cauces para a solidariedade social, concienciando a toda a sociedade, desenvolvendo proxectos que afronten os problemas sociais e as causas que a orixinan, loitando pola xustiza social e denunciando as causas xeradoras da pobreza e a exclusión.

Quinto.

O Concello de Santiago de Compostela e a Entidade “Cáritas Interparroquial”, en consonancia coa filosofía da diversidade, da igualdade social e da integración, teñen o propósito de dar estabilidade á colaboración que se vén producindo de maneira continuada entre ambas as dúas entidades, dado que a complexidade dos problemas sociais require da implicación de distintos colectivos no camiño de conseguir a xustiza e a igualdade social.

Co obxecto de facer realidade e pór en práctica os obxectivos expostos, tendo en conta a especificidade do obxecto da colaboración, e de conformidade co previsto no artigo 26 da Lei 9/2007, do 13 de xuño, de Subvencións de Galicia, se emprega o procedemento de convenio de colaboración.

Por todo o exposto as partes comparecentes acordan subscribir o presente convenio de colaboración de acordo coas seguintes

CLÁUSULAS

PRIMEIRA. Obxecto

Este convenio ten por obxecto establecer os termos da colaboración entre as partes asinantes para o desenvolvemento dos seguintes programas:

- ? **“Programa de Atención Primaria”**

SEGUNDA. Contido.

O contido de ditos programas sería o seguinte:

- ? **“Programa de Atención Primaria”**: é un servizo no que se atenden todo tipo de necesidades e a persoas de todas as idades e colectivos. Debido á especial situación destas persoas, son o obxecto principal da atención da Institución, dende onde se lles presta información e se lles axuda a reconducir dita situación, dentro das posibilidades da Institución. Os colectivos máis abundantes son os marxinados sen fogar e transeúntes, familias, inmigrantes, emigrantes retornados, minorías étnicas, xoves, mulleres... cos que tanto a traballadora social como o administrativo de Cáritas realizan actuacións de seguimento de casos, tramitación de prestacións, visitas domiciliarias, facilitan información, valoración, orientación e asesoramento, derivación, busca de emprego... Nalgunhas ocasións estas atencións teñen que ir acompañadas de prestacións económicas que se reparten principalmente en:

- ✍ Alimentación
- ✍ Medicamentos
- ✍ Alugueiros /Pensións
- ✍ Recibos de luz, auga e gas
- ✍ Desprazamentos
- ✍ Etc.

TERCEIRA. Contía da axuda

Para a colaboración na realización das actividades obxecto deste convenio, o Concello de Santiago de Compostela con cargo os seus Orzamentos Xerais Anuais correspondentes a cada exercicio económico aportará as cantidades que neles se dispoña nominativamente. En concreto para o presente exercicio económico, o Concello achegará á Institución a cantidade de TRINTA E CINCO MIL EUROS (35.000,00€).

CUARTA. Actividades excluídas de subvención.

As actividades excluídas desta subvención e que non poderán ser obxecto do convenio son:

1. Viaxes de carácter lúdico ou cultural.
2. Festas e outras actividades semellantes.
3. Aluguer de locais e mantemento destes.
4. Compra de bens inventariables.

QUINTA. Forma de Pagamento

Respecto da forma de pagamento, estarase o disposto as Bases de execución orzamentaria do Concello de Santiago de Compostela. Igualmente seranlle de aplicación o disposto na Lei 9/2007, do 13 de xuño, de subvencións de Galicia e na Lei 38/2003, do 17 de novembro xeral de subvencións.

O pago realizarase previa xustificación dos gastos realizados e do cumprimento da finalidade para a que é concedida a axuda, así como, da aplicación dos fondos destinados ó efecto.

A xustificación do cumprimento das finalidades que motivan a sinatura do convenio farase achegando:

- A correspondente memoria e documentación que acredite a realización do obxecto do convenio mediante a realización das actividades e o grao de cumprimento dos obxectivos.(antes do 15 de novembro de cada exercicio).
- Declaración de ter cumprido o obxecto do convenio.
- Relación detallada das subvencións ou axudas obtidas doutros axentes para idéntica finalidade.
- Relación detallada (data, concepto, importe, nº) das facturas ou documentos xustificativos que se presentan para a xustificación.
- Facturas orixinais de gasto (do ano en curso) ou os demais documentos de valor probatorio equivalente ou as súas fotocopias debidamente compulsadas, que serán obxecto dunha validación e estampado permitindo o control da concorrencia de subvencións (artigo 30.3 parágrafo 3º lei 38/03 e artigo 28.3 parágrafo 3º lei 9/2007)
- Se presentan facturas pagadas ao contado, declaración de que as mesmas foron pagadas integramente con cargo ós fondos da asociación.
- Certificación de estar ao corrente no cumprimento das súas obrigas tributarias.
- Certificación de estar ao corrente no cumprimento das súas obrigas coa Seguridade Social.
- No suposto de que as actividades fosen financiadas, ademais de por este convenio, con fondos propios, outras subvencións ou recursos, deberá acreditarse na xustificación o importe, a procedencia e a aplicación dos ditos fondos ás actividades subvencionadas. En ningún caso, a contía do convenio, só ou en concorrencia con outras subvencións, axudas doutras administracións, entes públicos ou privados, poderá superar a totalidade do custo da actividade que vai desenvolver a asociación.

Se, para realizar o obxecto do presente convenio a Entidade obtivese subvencións doutras entidades públicas ou privadas que, en concorrencia coa concedida superará o total do custo da actividade, minorarase a achega do Concello de Santiago. E procederá o reintegro do exceso obtido sobre o custe da actividade subvencionada, así como o interese de demora correspondente.

En todo caso, a data límite para a presentación dos xustificantes non poderá exceder do estipulado nas bases de execución orzamentaria do Concello de Santiago de Compostela.

Considerarase gasto realizado o efectivamente pagado antes do remate do período de xustificación.

Non poderá realizarse o pagamento da subvención en tanto o beneficiario non estea ó corrente no cumprimento das obrigas tributarias e coa Seguridade Social

Asemade porá a disposición do Concello de Santiago de Compostela cantos datos lle sexan requiridos respecto do desenvolvemento do devandito programa.

En todo caso, as achegas das anualidades correspondentes a vixencia deste convenio, quedan supeditadas á existencia de crédito adecuado e suficiente no exercicio económico correspondente, dando cumprimento os obxectivos de estabilidade orzamentaria e de eficiencia e utilización dos recursos públicos.

SEXTA. Obrigas do beneficiario

Con suxeición ós termos deste convenio, en cumprimento do establecido na Lei 9/2007, do 13 de xuño, de subvencións de Galicia, na Lei 38/2003, de 27 de novembro xeral de subvencións, e das Bases de Execución orzamentaria do Concello de Santiago de Compostela, a Entidade asinante ten entre as súas obrigas as seguintes:

- a) Cumprir o obxecto do convenio, realizando as actividades que fundamenta a concesión da subvención.
- b) Xustificar ante o Concello de Santiago de Compostela o cumprimento dos requisitos e condicións; así como a realización da actividade e o cumprimento da finalidade que determina a concesión.
- c) Someterse ás actuacións de comprobación a efectuar polo Concello de Santiago de Compostela, así coma calquera outras de comprobación e control financeiro que poidan realizar os órganos de control competentes, aportando canta información lles sexa requirida no exercicio das actuacións anteriores.
- d) Comunicarlle o Concello de Santiago de Compostela a obtención doutras subvencións, axudas, ingresos ou recursos que financien as actividades subvencionadas por este convenio. Esta comunicación deberá efectuarse tan pronto como se coñeza pola Entidade e, en todo caso, con anterioridade á xustificación da aplicación dada ós fondos percibidos.
- e) Acreditar con anterioridade o ditarse a proposta de resolución de concesión que se encontra o corrente no cumprimento das súas obrigas tributarias e da Seguridade Social.
- f) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ó beneficiario en cada caso, así coma cantos estados contables e rexistros específicos sexan esixidos para garantir o axeitado exercicio das facultades de comprobación e control.
- g) Conservar os documentos xustificativos da aplicación dos fondos recibidos, en tanto poidan ser obxecto das facultades de comprobación e control.
- h) O beneficiario deberá dar a adecuada publicidade do carácter público da financiamento dos programas e actividades obxecto do presente convenio. A tal efecto na publicidade das actividades farase constar de maneira expresa a colaboración do Concello de Santiago.
- i) Cumprir co resto dos requisitos e obrigas recollidas nos artigos 10º e 11º da Lei 9/2007, do 13 de xuño, de subvencións de Galicia.
- j) Proceder o reintegro dos fondos percibidos de acordo co disposto no artigo 13.2 K) da Lei 9/2007, do 13 de xuño, de subvencións de Galicia e en todo caso, nos supostos contemplados no artigo 33 da referida Lei.

SÉTIMA. Protección de datos

As actuacións en materia de cesión de datos de carácter persoal axustaranse ao disposto na Lei orgánica 15/1999, do 13 de decembro, de regulamentación do tratamento automatizado dos datos de carácter persoal e o seu regulamento.

A tal efecto e de conformidade coa normativa de referencia, a asociación tratará os datos de carácter persoal en relación coa actividade obxecto do convenio, que non os aplicará ou empregará con fin distinto ó estipulado, nin os comunicarán, nin sequera para a súa conservación , a outras persoas, estando sometidas ás correspondentes medidas de seguridade.

Cumprido o obxecto do convenio os datos de carácter persoal obtidos como consecuencia da realización de actividades deberán ser destruídos ou devoltos a esta entidade, así como o soporte material ou documentos resultantes en que conste algún dato de carácter persoal. No caso de destinar os datos a outra finalidade non conveniada ou incumpra o estipulado, incorrerá en responsabilidade pola infracción cometida.

OITAVA. Seguimento e avaliación

Para a interpretación de cantas dúbidas xurdan na aplicación do convenio créase unha comisión mixta, que estará integrada polas persoas que sexan designadas para o efecto por parte das dúas institucións (técnicos da Concellaría de Benestar Social e da devandita Entidade). Esta comisión velará polo cumprimento dos obxectivos fixados.

NOVEVA. Causas de resolución

Son causas de resolución do presente convenio, e procederá, se é o caso, o reintegro total ou parcial da axuda percibida e os xuros de mora devengados dende o momento do seu pagamento (artigo 13.2 K) da Lei 9/2007, do 13 de xuño, de subvencións de Galicia) as seguintes:

1. O incumprimento de calquera das cláusula establecida no presente convenio.
2. A aplicación total ou parcial dos fondos outorgados no convenio para fins distintos dos que motivaron a súa concesión.
3. A falta de xustificación do emprego das cantidades recibidas.
4. Os demais supostos previstos nos artigos 32 e 33 da Lei 9/2007, de 13 de xuño, de subvencións de Galicia.

DÉCIMA. Duración do convenio

A presente convenio entrará en vigor na data da súa sinatura, e terá vixencia ata o 31 de decembro de 2.008 e financiará gastos correspondentes ás accións desenvolvidas durante o exercicio 2.008 para o cumprimento dos obxectivos nel establecidos.

Non obstante, poderase prorrogar, por acordo expreso, por igual período de tempo, de conformidade co disposto na Lei 38/2003 xeral de subvencións (artigo 16).

En todo caso, calquera das partes poderá denunciálo comunicándoo por escrito á outra parte con dous meses de antelación a finalizar o período de vixencia.

UNDÉCIMA. Carácter do Convenio

Este convenio ten carácter administrativo, rexéndose ós seus efectos polas cláusulas establecidas nel, e no non previsto, seranlle de aplicación o disposto na Lei 9/2007, de subvencións de Galicia, na Lei 38/2003, do 17 de novembro, xeral de subvencións e a Lexislación de Réxime Local aplicábel ó caso.

Non obstante o anterior, as cuestións litixiosas que poidan xurdir sobre este convenio, respecto da interpretación, resolución e efectos do convenio, serán resoltas en última instancia administrativa polo Illmo. Sr. Alcalde do Concello de Santiago de Compostela, poñendo os seus acordos fin a vía administrativa, contra eles poderá interpoñerse recurso contencioso-administrativo, segundo establece o artigo 46.4 da Lei 29/1998, reguladora desta xurisdición. Para este efecto, será competente o Xulgado do Contencioso Administrativo de Santiago de Compostela.

E, en proba de conformidade, ambas as dúas partes asinan este convenio por duplicado, no lugar e na data sinalados no encabezamento.

Polo Concello de Santiago de Compostela

Por Cáritas Interparroquial

Asdo.:Xosé Antonio Sánchez Bugallo

Asdo.: Amelia Pereira Menaut

